

Tranter Assad ed ils islamists

Cristians e Curds en la guerra da Siria

■ (gsc) La Siria, sco plis stadis asiatics, africans ed europeics d'oz, deriva dals patgs ch'ils victurs da 1918 han sfurzà si 1919 e 1920 als pajais victorisads. L'onn 1920 ha la Societad da las naziuns incumbensà la Frantscha d'administrar e manar a l'indipendenza in intschess da lingua araba, antruras osmanic, situà tranter il flum Tigris ed il Mar mediterranean. La Frantscha ha immediat zavrà dal rest in chantun muntagnard (enfin a 3088 m) cun 225 km da costa mediterranea che ha sa proclamà independent 1943 sco Libanon. Il 1939 ha la Turchia annectà il chantun nordvest dal territori (5867 km²) cun l'antica citad d'Antiochia. Il rest è la Siria d'oz (185 180 km²) cun sia chapitala Damascus.

La Siria sco pajais na datti betg pli

Il magazin internaziunal «The Economist» (Londra) scriva en ses numer dals 27 da fanadur 2013: «La Siria sa parta plaun a plaun en trais tocs. Las forzas da president Assad (...) na pon betg batter l'opposiziun, ma rinforzan lur pussanza sin la spina dorsala da la Siria dal vest (...). Il reschim sa stgaffescha in stadi mediterranean. Ils rebels da lur vart construeschan in agen stadi extremist en la vallada da l'Euftrat (per arab «Furà») tranter la Turchia e l'Irac (...). Encunter l'ost profitechan gruppas curdas, persecutadas ditg, dal caos da la guerra civila per stabilir ina regiun autonoma (...). A l'entschatta da fanadur 2013 hani bittà or ils islamists radicals da la citad da cunfin da Ras al-Ain [per curd Serecani]» (p. 31). L'artitgel concluda: «Syria as a country has ceased to exist» («La Siria sco pajais na datti betg pli»). La Societad per ils pievels smanatschads (Göttingen; nah-ost@gfbv.de) rapporta en ses appel dals 28 da fanadur: «Var in milliun fugitivs, t. a. 100 000 cristians arameics, armens ed autras minoritads, han chattà protecziun e segirtad en ils intschess curds. Er insaquants tschientmillis Curdas e Curds da Damascus e Halep, nua ch'ins cumbatta, èn fugids vers l'intschess curd (...). Curds, cristians ed autras minoritads sa sfadiavan dapi l'entschatta dal conflict per cuntanscher ina vieuta paschaivla e democratica. Ma l'opposiziun armada, oramai per gronda part sutminada d'islamists radicals, leva a tut pretsch implitgar las minoritads en la sanguinosa guerra civila. Cristians e Curds han refusà; dapi lura s'augmentan ils assagls da vitgs curds ed arameics ed ils rapinaments da femnas ed uffants. Nus remain che quellas forzas radicalas, sch'i triumfeschan, mazzacrian populaziuns dals intschess curds (...). Ma era da las truppas d'Assad stuess ins spetgar acts da vendetga.»

Trais spirituals svanids

Cristians datti en Siria dapi bunamain 2000 onns. Ils Fatgs dals apostels rapportan en lur 9avel chapitel che Scha'ul



Il reschim sa stgaffescha in stadi mediterranean. Ils rebels da lur vart construeschan in agen stadi extremist.

KEYSTONE

saja vegnì cristian gist a Damascus. Davent dal 13avel chapitel vegn el numnà Paulus. La Baselgia catolica e quellas da l'Orient venereschan il teolog Gion da Damascus (†750). La «Frankfurter Allgemeine Zeitung» (FAZ) dals 2 d'avust 2013 rapporta: «Oz smanatscha la guerra civila siriana da destruir lezza tradiziun cristiana duas giadas millenara. L'emprim ha l'agentura da novitads Reuters rapportà ch'ins haja rapì il gesuit talian Paolo Dall'Oglio en la citad da Racca sper l'Euftrat, en possess d'ina gruppa terroristica (...). Almain 20 % dals cristians han bandunà la Siria (...). Ma tgi che stat a Halep na po betg fugir, perquai che lezza segunda citad dal pajais è circumdada d'intschess controllads da rebels e d'islamists. La glied da Halep planscha perquai ch'ils rebels blocheschian ils corridors da provediment per mangiativas e medicaments. I dat era damain forza ed aua. Truppas dal reschim paran da pinar in'offensiva cunter la citad, (...) perquai crescha la tensiun (...). Ils 22 d'avrigl 2013 han ins rapì dus uestgts ortodoxs da Halep, Gregorius Hanna Ibrahim e Bulos Jasidschi (...). Dapi lura na daud'ins nagut pli d'els (...). Lur manischunz han ins mazzà immediat; ins ha relaschà la quarta persuna da la gruppa (...). Tgi sa sch'ils uestgts vivian anc? Nua èni? Co vai cun els? Tgi als tegni en fermanza e pertge? Ins nun als anc chattads nagliur. Igl è insolit che

nagin n'haja anc formulà pretaisas per in barat, sco ch'igl è uschiglio il cas tar rapiments. Uvestg Gregorius basegna medicaments encunter sia pressium memia auta dal sang. Durant ils davos mais avant il rapiment è'l vegnì ina vusch critica cunter il reschim d'Assad e cunter ils rebels. El n'è betg pli mo uestg, ma bain er adina dapli il pledader politic da sia Baselgia. D'avust 2012 ha'l publictà in plan da pasch per la Siria per segirar ina convivenza paschaivla da tut las gruppas socialas e religiusas. Las cumanzas dals uestgts rapids han ussa pers lur manaders. Sper la pastoraziun gestioneschan las Baselgias scolas e spitals e prestan lavur caritativa. Uvestg Gregorius ha ditg a l'entschatta da l'onn: 'Jau stun qua, jau stoss esser cun mia raspada.' Ma l'exodus da la Siria va vinavànt.» Uschia la «FAZ». Ils 5 d'avust ha Tilman Zülch, pursura da la Societad per ils pievels smanatschads, scrit a Guido Westerwelle, minister federal da l'exteriur: «Quai n'astga tuttina betg vegnir adaquella che daners tudestgs da taglia gidian a financiar la coaliziun naziunala siriana, controllada da la Confraternitad islamistica, perquai che sias gruppas armadas mainan ina guerra averta cunter Curds, cristians ed autras minoritads (...). I n'astga gnanca dar in sustegn diplomatic, enfin che civils e dignitaris religius curds e cristians èn unfrendas d'assagls e rapinaments.»